

□ कविता

मरण-पंथ रा पंथी

सुमनेश जोशी

कवि परिचै

सुमनेश जोशी रौ जलम जोधपुर में होयौ। आप डील-डौल सू सैंठा, काम-काज में मैनती, लगन रा पक्का अर कलम रा धणी हा। सरीर मुजब ई मन ई मोटौ हौ आपरौ। देसी राज्यां री राजनीतिक क्रांति में आपरै त्याग अर बळिदान री चरचावां घणी चावी है। देस रै वास्तै साची प्रीत रै कारण वै राज री नौकरी छोड-छिटकायनै आंदोलनकारियां रै भेळा भिळग्या। संवेदनशील होवण रै कारण वै घर-परिवार सू बेसी देसहित में आपरै करतव्य रौ पाळण कर्यौ। जोशी आपरै गीतां अ रचनावां सू क्रांतिकारियां में जोस जगायौ, उणां नै चेताया। क्रांति रा गीत लिखणा कवि रौ करम हौ। सामंती जुलमां सू आंती आयोड़ा मिनखां नैं उबारण वास्तै लेखणी रौ जोर लांठौ हौ। आपरा गीत आजादी सारू लड़गिया सिपायां खातर जीवण-जड़ी हा। जणा-जणा रा मूंडा माथै उणां रै गीतां रा बोल, उणरा भाव सू जाग्योड़ौ ओज हौ। अ गीत क्रांति री लपटां में 'बळती में पूळ' रौ काम कर्यौ। आजादी रै पछै ई कवि आपरी कलम हेटी नौ न्हाखी। उणीज ओज अर जोस सू नूवै उछाह साथै नव-निरमाण रा गीत लिख्या। आपरौ गीत संग्रै राजस्थान सरकार रै सार्वजनिक संपर्क कार्यालय सू छपियौ हौ। केई अबखायां अर मानसिक चिंतावां रै पछै ई सुमनेशजी में आस-विस्वास, हिम्मत, मरदानी गाडां-गाडां भर्योड़ी ही। आपरा गीतां में अ सगळी विसेसतावां है। सेनानियां रै इतिहास रौ अक मोटौ ग्रंथ ई आप छापियौ। इणरै ओळवै मायड़भोम रा वां सपूतां नैं स्रद्धांजळी दी।

पाठ परिचै

'मरण-पंथ रा पंथी' क्रांतिकारी कवि सुमनेश जोशी री रचना है। इण रचना में कवि रै सुभाव मुजब त्याग अर बळिदान री बात प्रतीकां रै ओळवै कहीजी है। अक बीज आपरौ आपौ मेटे जद अणगिण रूख ऊगै। बादळ खुद नैं मिटावै जद बिरखा बूटै। दीवौ बळनै उजास रौ पसराव करै। झरणौ परबतां सू नीचै आवै जटै ताई ई उणरौ रूप रैवै पछै वौ नदी-नाळां रौ रूप लेय लेवै। कवि कैवै कै औ मानखौ बीज सू ऊग्योड़ा रूखां नैं, दिवलै रा उजास नैं, बिरखा अर बैवता झरणौ नैं देखै, उणरै लारै जिकौ त्याग है उणनैं अर आपौ मेटण री बात कुण देखै? आ तौ उणां री नियति है। घणा रंग वां धरती रा जायोड़ां नैं, जिका खुद मिटर समाज अर देस नैं कीं देयने जावै। त्याग अर बळिदान देवणिया जस री बाट नौ जावै। उणां रा जस गीत गाईजै कै नौ। वांनै कोई याद करै कै भलाई नौ करै। आपरौ फरज, करतव्य समझनै वै करम करै। इण माटी रा सपूतां में अर प्रकृति रा कण-कण में त्याग अर समरपण रा भाव है। अक रौ विणास अर दूजै रौ सिरजण, आ प्रकृति री रीत है। कर्मठता, त्याग, बळिदान, समरपण री सीख इणसू मिल्तै तौ नव-सिरजण री प्रेरणा ई आं प्रतीकां सू मिल्तै। सहज अर सरल सबदां में कवि आपरै अंतस रा भावां नैं उकेरिया है। 'मरण-पंथ रा पंथी' मतळब जिका म्रित्यु रै मारण आगीवाण होयनै चालै अर समाज नैं नूवी दिसा देवै।

देस री आजादी में कितरा मायड़ भोम रा सपूत बीज बण आपरौ बळिदान दियौ। बदळै में आजादी रूपी हरियल रूख री छिया आपां नैं सूपी। आजादी रूपी महल नैं ऊभौ करण खातर कित्ताक अचळेसर नींव नीचै दबिया होवैला, कांई उणां रा बळिदान नैं आपां याद करां? खुद नैं मिटावण वाळा वै सपूत, वै स्वतंत्रता सेनानी जस रा भूखा कोनी हा। कवि इण गीत सू वां स्वतंत्रता सेनानियां रै त्याग अर बळिदान नैं याद करै।

मरण-पंथ रा पंथी

माटी में मिल गया बीज जद,
ऊग्या रूख हजारा
आपौ मेट, मिट्यौ जद बादळ,
फूटी जळ री धारा

दिवलो जळ-बळ मिल्यौ खाक में,
कर्यौ जोत उजाळौ
मरण बांध कूद्यौ सिखरां सूं,
वौ झरणौ मतवाळौ

वौ झरणौ मतवाळौ—
उण रौ मरण-पंथ कुण देखे
जग तौ प्रीत करै ज्योती सूं,
बळणौ करमां लेखे

बीज गया पाताळ,
धरण सूं ऊंचा तरवर छाया
नीवां में गड गया—
उणां रा गीत न कोई गाया

कोई गावै गीत, न गावै,
उणनै कद अभिलासा
मरण-पंथ रा पंथी तौ बस,
करम करण रा प्यासा

धिन-धिन वै धरती रा जाया,
जो निज आपौ मेट
नयौ रूप आकार धरा नै,
जो कर जावै भेट

अबखा सबदां रा अरथ

ऊग्या=ऊगणौ, उदय होवणौ। आपौ=असित्व। मेट=मिटायनै। फूटी=बरसी। खाक=समाप्त, मिटणौ। सिखरां=ऊंचा परबत सूं। मतवाळौ=अहम वाळौ, मद वाळौ, गीरबै सूं भर्योड़ौ। बळणौ=दीयै रौ जगणौ, बाती री लौ लागणी। तरवर=रूंख, बिरछ। अभिलासा=चावना, मनसा, इच्छा। गड गया=दबग्या, माटी रै नीचै दबणौ। धिन-धिन=धन्य-धन्य, लखदाद। नयौ रूप=नव सिरजण, नूवौ निरमाण।

सवाल

विकळपाऊ पडूत्तर वाळा सवाल

1. कवि सुमनेश जोशी किण भांत रा मिनख हा—
 (अ) डील-डौल, कलम नै काम सूं महाप्राण। (ब) सांस लेवण में अल्पप्राण।
 (स) डील-डौल सूं मोटा मतवाळा। (द) इण मांय सूं अेक ई नीं।

()

2. सुमनेश जी रैवासी हा—
 (अ) बीकानेर (ब) जैसलमेर
 (स) पूगळ (द) जोधपुर

()

3. “धिन-धिन वै धरती रा जाया”, इणमें ‘धरती रा जाया’ है—
 (अ) बादळ, बीज, माटी। (ब) मायड़ भोम रा सपूत।
 (स) नदी, नाळा, झरणा। (द) अचर अर चर जगत।

()

साव छोटा पडूत्तर वाळा सवाल

1. सुमनेश जोशी किण भांत रा गीत लिख्या?
2. कवि सुमनेश जोशी नौकरी छोड'र काई काम कर्यौ?
3. ‘मरण-पंथ रा पंथी’ कुण हा?
4. बादळ आपरौ आपौ मेटनै काई बरसावै?

छोटा पडूत्तर वाळा सवाल

1. रूंख ऊगण रै लारै कवि किणरौ किण भांत त्याग बतावै?
2. कवि सुमनेश जोशी रै व्यक्तित्व री चार विसेसतावां बतावौ।
3. कवि री रचनावां रौ संग्रै कठै सूं छपियौ अर गीतां रा भाव काई हा?

लेखरूप पडूत्तर वाळा सवाल

1. कवि सुमनेश जोशी रै व्यक्तित्व अर कृतित्व ऊपर लेख लिखौ।
2. ‘मरण-पंथ रा पंथी’ कविता रौ भाव आपरै सबदां में लिखौ।

3. कवि सुमनेश जोशी री दीठ में मरण-पंथ रा पंथी किण मारग चालै अर औ अंवळौ मारग समाज नैं कांई देवै ?
आपै विचारां सूं खुलासौ करौ ।

नीचै दिरीज्या पद्यांसां री प्रसंगाऊ व्याख्या करौ—

1. माटी में मिल गया बीज जद, ऊग्या रूख हजारा
आपौ मेट, मिट्यौ जद बादळ, फूटी जळ री धारा
2. कोई गावै गीत, न गावै, उणनैं कद अभिलासा
मरण-पंथ रा पंथी तौ बस, करम करण रा प्यासा
3. धिन-धिन वै धरती रा जाया, जो निज आपौ मेट
नयौ रूप आकार धरा नैं, जो कर जावै भेट